



# Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 10 Yangia anidakangma :

f Tir Yimyim

Instagram tiryimyim@aolima

YouTube tir yimyim

TAPAK 8

Emma Raducanu-i US Open kokogo

Süogo ta jembisang al-Qaeda lenir al-Zawahiri video nung adok



VOL. XVIII NO. 331 (ADOK 331) DIMAPUR

TENTONÜ (MONDAY)

RONGJUI (SEPTEMBER) 13, 2021

₹ 5.00

## COVID-19 Nagaland: 51 taneptsü angu, 36 dak putet & 3 asü

**Kohima, September 12, 2021 (TYO):** Nagaland nung tanü agi anogo pezünü atongtepa COVID-19 puteter dang nungibo taneptsü angur teimba liasü. Tanü nisung 51 taneptsü angu aser 36 dak putet.

"Tesüiba ghonda 24 tsüngda nisung 36 dak COVID-19 aliba putet. Parnokji Kohima nung 16, Dimapur nung 10, Wokha nung 4, Mokochung nung 3, Zunheboto nung 2 aser Tuensang nung 1 lir" ta Integrated Disease Surveillance Project atema State Nodal Officer, Dr Nyanthung Kikon-i ashi.

"Kasa mapang COVID-19 agi shiranger nisung 51 taneptsü angu. Parnokji Dimapur nung 28, Kohima nung 17, Longleng o Mokochung nung anana (2) aser Kiphire o Phek nung kaka (1) lir" ta paisa ashi.

Nisung 30,630 rongnungi 28,439 taneptsü nguogo aser ibaji 92.84% lir. Tang nisung 618 anepaludar, ta Dr Kikon-isa ashi.

Deobarnü Dimapur nung

COVID-19 puteta alir nisung 3 asü aser parnok züngsema tasür ajak agi 639 kümogo, ta paisa metetdaksü.

Tang tashi nung COVID-19 alitsü akok ta temolung melemba sample 345,892 tendangogo. RT-PCR ajanga 107,014, TrueNat ajanga 79,600 aser Rapid Antigen Test ajanga 159,892 tendang, ta Dr Kikon-isa ashi.

"Honibar tashi nung nisung 669,460 nem COVID-19 vaccine indang dose 924,187 agütsüogo" ta State Immunization Officer, Dr Ritu Thurr-ia ashi.

"Vaccine agirtemji frontline workers 60,859, healthcare workers 15,993, arishi küm 45 nungi temapur 194,979 aser arishi küm 18 nungi 44 tsüngda alir 397,629 lir" ta paisa ashi.

Vaccine agirtem rongnungi nisung 254,727-i dose anaprong agiogo. Parnokji frontline workers 45,339, healthcare workers 13,035, arishi küm 45 ser temapur 121,057 aser arishi küm 18 nungi 44 tsüngda alir 75,301 lir, ta Dr Thurr-isa ashi.

## IB Special Director Mishra-i RN Ravi melenzüksü akok

**Guwahati, September 12, 2021 (Agencies):** Centre sorkari taoba Naga yimjung olemtep asoshi interlocutor inyaksü atema Intelligence Bureau (IB) Special Director Akshaya Kumar Mishra shimtsü sentong lir.

Nagaland Governor-i NSCN (IM) dena Naga telungpur telok balala den mangatetep adokba sülen Hokolbarnü Centre-i Nagaland Governor RN Ravi mapa nungi agienogo.

Governor mapa nungi agienba sülen Ministry of Home Affairs Ravi ket nungi interlocutor mapa agientsü sentong lir.

"Nagaland nung governor aser interlocutor mapatem sendaktepa lir. NSCN (I-M)-i maginüaka Ravi ya Nagaland governor inyaksü atema yok. Pai nungdakba mapa inyaksü aser yimjung maparen tejakleni bener aotsü atema yok. Ajisüaka, ibaji matalok anungji pa melenzüksü" ta The Wire ajanga metetdaksü.

"Retired additional/special director of Intelligence Bureau Akshay Kumar Mishra-i Ravi melenzüksü akok. Muivah aser Ravi tsüngda tesentaktep mejungi akümba sülen Rajasthan cadre nungi 1987 batch IPS officer Mishra-i NSCN den inyaksangshia arur" ta parnokisa ashi.

Mishra-i Naga yimjung olemtep atema Interlocutor inyakba nung IB Director Arvind Kumar-i additional Interlocutor ama inyaksü akok ta osang angazüker.

Taoba Nagaland Governor RN Ravi aser Naga telungpur teloktem tsüngda temolung melemtetep adokba ajanga pa mapa melentsüsa aküm.

Tesüiba küm ana tashi Ravi-i National Socialist Council of Nagaland (Isak-Muivah) den mangatetep adoka aruogo.

Centre-i 2015 küm Naga peace talk interlocutor inyaksü atema RN Ravi shim. Pa ya Kerala cadre nungi 1976 batch IPS officer ka lir.

## Foothill Road atema lungkak aittsü aliba athir



Governor's camp, Liphayan nung Doyang apu yangluba angur. (File noksa)

**Dimapur, September 12, 2021 (TYO):** September 12, 2021 nü Nagaland Foothill Road Coordination Committee (NFHRCC) aser Dimapur nung amenoka aliba teloktem senden amandang asung (Sep 13) nungi mapang telatet makai lungkak aittsü aliba thinena atatsü lemtetogo.

"Sorkari telangzüba tajung agütsüba atema pelaba sayuba den NFHRCC aser bangdak department tsüngda tangatetep kati maru tashi September 13, 2021 nungi lungkak aittsü sentong aliba thinena atatsü lemtetogo" ta NFHRCC-i

sangdong ka nung metetdaksü. Ajisüaka, tawa tentetba "Young Nagas Action Committee for Foothills Road" meloksai dang inyaksangshia aotsü, ta parnokisa ashi.

"Chief Minister Nephru Rio aser Deputy Chief Minister Yanthungo Patton nati senotsü peria meliaka Foothill road nung gari tilabo senzütettüsa yanglutsü atema sen agütsüba atema tenüngsang agütsür. Iba ajanga tena lenisüba tajung aser nübertem taginüba angatetba sayur. Maneni, bangdak MLA tem aser Department of PWD (R&B) temi Naga otsüsütsü

mapatong asangsang kümdaktsütsü atema yaritepba atema tenüngsang agütsür" ta NFHRCC-isa metetdaksü.

Tanü senden nungsa India sorkar dang Khelma nungi Tizit tashi Trans Nagaland Expressway (Mega Project) ta tekaratiba nung sangdongtsü atema ayongzüksü telemtetba agi.

Iba onük asoshi senden nung adenertemi NFHRCC nem Ministry (MoRTH) aser PMO den tekaratiba nung ajurutepa jembitsü mapa lemzüksü.

NFHRCC-i Foothills Road asoshi inyaka aruba mapatem nung Ao Senso Telongjem Dimapur, Chang Union Dimapur, Lotha HOHO Dimapur, Konyak Union Dimapur, Khiamiungam Union, Dimapur Phom Union Dimapur, Sangtam Union Dimapur, Apex Lotha HOHO Wokha, Western Sumi HOHO, Western Yimkhiung HOHO, Nagaland Zeliang Peoples' Organisation, CNTC, ENPO, CNSA, DENSU, ZLSU, DAYO, LYOD aser WSYF teloktemi nungita yaria atema pelar.

Talisa, print media, social media aser TV Channels-ia osang tejangja sangoktsüba atema pelaba shisemer, ta NFHRCC-isa metetdaksü.

## PSAN-i RPP dang pelar; NSSB tentettsü akhanger

**Dimapur, September 12, 2021 (TYO):** Rising People's Party (RPP)-i High Court nung PIL ka agütsüba ajanga Nagaland sorkari Departmental Exams aigtsü indang sangdong meyipa agiogo aser iba atema RPP nem tenüngsang agütsür, ta Public Service Aspirants of Nagaland (PSAN)-i ashi.

State sorkari nübor ola angatsüla aser NPSC kübok madenba Grade III mapatem atema NSSB ajanga anioktsü asoshi maparen inyaksüla. Zünger mapa manguba

lanurtemi jashiba mazüokteter. Sorkari mapang atsülangba ajanga lanurtemi küm aika akoksa arur aser karbo 'age limit' adenogo, ta Media Cell, PSAN-i sangdong ka nung ashi.

2018 küm nisung meyirjang aika adenshia lia aser talisa lanurtem dang PDA sorkari tenangzüker agiba bilemtettsü ayongzüker. Külen, 'Temelenshi Arudar' ta parnoki yimyim ayimoktsüba nübertemi mama lir. Nagaland nung opposition maliba sorkar ka akümba ajanga tang tashi nung meinyaki aliba

mapatem inyaksütsü imlar, ta PSAN-isa metetdaksü.

Ita aika shisalemsatempa aruaka tang tashi NSSB mapa küma metenzükter. Sorkari iba tebilemtsü atema mapa inyaksüla aser welfare state ka ama Nagaland asoshi policy yangluba alibatem inyaksüla ta parnokisa ashi.

Nagaland nung zünger mapa manguba khuret ulura kümogo anungji Civil Society tem, arogotem aser tanga teloktem nungi teyari nungdaker, ta PSAN-isa ashi.

## Centre-i NE nung Ayush college lapoktsü atema yaritsü: Sonowal

**Guwahati, September 12, 2021 (Agencies):** Linük nung Ayush college talila lapoktsü atema Rs 9 crore nungi Rs 70 crore tashi agütsütsü ta Union Minister for Ayush and Ports, Shipping & Waterways, Sarbananda Sonowal-i metetdaksü.

National Ayush Mission indang Centrally Sponsored Scheme ajanga state sorkartem nem Ayush college lapoktsü

atema Rs.9 crores agütsür. Tang India sorkari Rs.70 crore kümtsüogo aser state sorkartem iba asoshi ali aser nübo bushitsü, ta Sonowal-i ashi.

Ministry of Ayush-i Government Ayurvedic College, Jalukbari, Assam nungi Centre of Excellence ajungkettsü atema agizükogo. Iba atema Rs 10 crore agütsütsü. Ministry-i under-graduate teaching colleges ajungkettsü atema Rs.

5 crore aser post graduate institutions nung infrastructure yanglushitsü atema Rs. 6 crore agütsür.

Union Minister Sonowal-isa Central Ayurveda Research Institute (CARI), Guwahati nung Panchkarma Technician course tenzüker osang metetdaksü.

"Tesüiba küm ishika tsüngda Ayush sector nung mapa aika adokogo" ta paisa shisem.

### DCCI-i ayongzükba sentong nung NVCO-i puhkuma nokdaker

**Dimapur, Rongjui/Sept. 12 (TYO):** Telok balala aser sorkar indang agency balalai ozüing alema senotsü saruba/meshiba anema Dimapur Chamber of Commerce and Industries (DCCI) ajanga September 16, 2021 nü dokan ajunga shibangtsü sangdongba nung Nagaland Voluntary Consumers' Organisation (NVCO) dena lir, koba Nagaland market nung jenjang temlokba tera tazüing lir, ta NVCO sangdong ka ajanga ashi.

State kübok market nung kanga tongtipang aser kangabo tongtipang masüba osettsüset (essentials & non-essentials commodities) alidang sen tali agütsüba ajanga ozüing alema senotsü meshiba consumer temi angateta kumogo, aser DCCI ajanga item anema September 16 nü Dimapur nung dokan ajunga shibangtsü ayongzükba nung NVCO-i akhang-akhanga nungiter, ta ashi.

Ozüing alema aser temelaba melie saru saruba nung nüburtemi ajem ajema repranga melitetsü, koba agi state nung osettsüset jenjang tali tudaktsür aser makamaiter tem dak tali kongshia tang COVID-19 tashidak wara mapang tali tim atemer aser state sorkari tim jenjang ka lateta mamshidaktsüteter aser Essential of Commodities Act junga mamshitet, ta NVCO tir Kezhokhoto Savi-i ashi.

Ozüing alema tax saruba, talisa osettsüset belener aser shishilempar dang telok balalai senotsü meshiba state sorkari maziüoktetba atema tenüing asenba mapang NVCO ajanga Nagaland Chief Secretary aser Director General of Police

dang iba atema telangzüba agütsütsü ashi. Sorkar indang tax agütsüba den külemi Nagaland nung aliba nüburtemi telungpur telok pongu - NSCN(I-M), GPRN/NSCN, NSCN(K) aser Naga National Council (NNC) indang faction ana nem saru balala agütsür, ta human rights activist nübu tejen, Radhakanta Tripathy-i National Human Rights Commission (NHRC) nung taoba mapang petition ka benoka liasü.

Telungpur telok balalai ozüing alema senotsü saruba den sorkari mapa meinyakba ajanga nisung ka takum alitsü temeden magütsüteter, ta NVCO sangdong ajanga ashi. Nagaland nung aliba nüburtemi telungpur telok balala nem tax tabu balala agütsüba den külemi Highways nung jajaba aser check-gate tem nung commercial vehicle nung tashiyim agi senotsü meshiba mereprang yutsür, ta Tripathy-isa shia liasü.

NHRC teka amuokba sülen Nagaland Chief Secretary aser DGP Nagaland ajanga state nung ozüing alema inyaksangshiba aziüoktsü asoshi akokba meratem agir, ta metetdaksü.

Iba sülen Confederation of Nagaland Chamber of Commerce & Industry (CNCCI), DCCI aser Mokochung Chamber of Commerce & Industry (MCCI) densena shishilempar tentet balalai Naga Political Groups (NPGs) ajak dang tax tabu balala saruba anentsü akhang aser state sorkar danga state nung iba amala inyaksangshi mittsü asüingdanga liasü.

Shishilempar tentet balalai

timtem ajuruba jungjunga asadanga sülen NVCO tir Savi-i Nagaland Chief Secretary aser DGP dang 'state nung telungpuri ozüing alema inyaksangshiba aziüoktsü asoshi akokba mera agiogo' ta NHRC dang ashiba nung telangzüba agütsütsüla, ta ashi.

Chief Secretary aser DGP Nagaland ajanga NHRC nemo sang agütsüba ya koba tashi shidak inyaka arur, kong shishilempar telok balalai state nung telungpuri ozüing alema inyaksangshiba aziüoktsü asoshi tang tashi takhangba agütsür, ta NVCO ajanga asüingdang.

Police aser sorkar agency tem densema telok balalai ozüing alema iba ama saru saruba ajanga state nung osettsüset nung jenjang tali tasakba kumdaktsür, ta NVCO ajanga ashi.

Aiben truck driver temi Nagaland-i aittsü memolunger, kechiaser ozüing alema tax counter balala lapoka yur truck driver tem anendakja sen meshir.

Check gate aser highway tem nung ozüing alema senotsü saruba/bendenba anentsü asoshi Gauhati High Court ajanga June 3, 2014 nung obendang agütsüba mapa kuma inyaksü atema NVCO ajanga state sorkar nem tezüluba nung aiben agütsüogo, ta NVCO tir Savi-i ashi.

State sorkaria Police, Excise, Forest ase Taxes department amala densema sorkar department aser lokti tentet mesüra kijai saru memeshitsü, ta 2009 küm June 22 nü telemtetba agia lir, saka tanü tashi mapa kuma meinyaker, ta sangdong ajangasa ashi.

### Tening Cultural Research Society ajanga album ka saya



Tening nung September 10, 2021 nü Tening Cultural Research Society ajanga parnok indang mezüingbuba album sayaba sentong nung tetushi tesemdanger, Achakbo Newmai, Superintendent Engineer Department of Agriculture nem tetushi agütsüba mapang tangokba noksa ka yangi angur.

**Dimapur, Rongjui/Sept. 12 (TYO):** Tening Cultural Research Society, Tening village ajanga sobaliba inyaksangshi balala indang album mezüingbuba sayaba sentong ka Tening Village Council Hall nung September 10, 2021 nü agia liasü. Iba sentong nung Achakbo Newmai, Superintendent Engineer, Dept. Of Agriculture Department ya tetushi tesemdanger ka ama arua dena liasü.

agütsüla aser tang amshiba yimsü-yimpong mesamadaktsü tarutsü atema inyaksüla, ta Newmai-i ashi.

Sobaliba jenjang aser nüburtem ayak wazüka ayutsü aser kasa mapang lipukum tajungba kumdaktsütsü asoshi lanu putu ajungmesotsü nükjidong nung iba sentong ya ayongzüka liasü.

Iba sentong nung vice chairman, Kinkariulung menden liasü, secretary Kigabo Secretary ajanga tarur pela agizükba o jemi aser president Kaidinlung Chawang ajanga melepzüing o jembia liasü.

### Kiphire nung skill development training agütsü



Kiphire nung school züngtur anenba lanurtem asoshi skill development training ka agütsüba mapang Issac Tsalembi Sangtam-i jembidang tangokba noksa ka yangi angur.

**Dimapur, Rongjui/Sept. 12 (TYO):** Tanü District Horticulture Officer (DHO), Kiphire ajanga school züngtur alirtem asoshi skill development training sentong ka PMKSY sentong kübok ayongzüka agia liasü.

lir aser sen aatsü atema sorkar mapa kisüing nung metaloka malitsüla, ta pai ashi.

Tarutsü asoshi tila tanurtem ya rongsen amai lir anungji asen lokti nung temelenshi tajung atema bilemtsüla, ta ashi.

Iba sentong nung shisalen sayurtemji Senti Longchar, DHO aser Sero Sangtam, HEA na liasü.

Iba sentong nung tesemdanger tongti ka ama jembiba mapang, lanur activist Issac Tsalembi Sangtam-i ashiba agi, tanü putu nung asen poksünga aser peria alitsü atema sector mashi nung skills nüngdaka kumogo.

Sentong ya Rishu Philip, Horticulture Inspector menden süer agia liasü.

Maneni taruba skill development training sentong ya Sanphure yimtsüing nung agitsü, kong Hombarnü mapa meinyaker kinungtsütem aser Mongulbarnü tetsür aluyimer asoshi ayongzüka agitsü.

Mapa shia alirtem asoshi sen aazüoktsü atema lenmang peria

### Küm ti sülen Assam nung UPLA par sasa shibanger

**Bokajan, Rongjui/Sept. 12 (Agencies):** Küm ti jungnüa rara aruba sülen UPLA ya Assam indang Karbi Anglong district nung aliba Bokajan subdivision kübok Balipathar nung aliba camp nung Deobarnü sentong ka agiba mapang par sasa shibanga liasü.

Liberation Army (UPLA) ya dena liasü.

Ministry of Home Affairs (MHA) den kin balala telok trok-i September 4, 2021 nü Memorandum of Settlement (MoS) ka zülutepba nung aliba ama iba telok ya shibanger alitsü.

Tawa New Delhi nung Centre den Karbi Peace Accord nung meyongnem agütsüdak United Peoples'

UPLA nungi züingsem 387 tashi kidangi meyipa shilanga sorkar indang rehabilitation sentong ajanga nüburtem den

lirumedema alitsü renemogo.

UPLA ya taoba mapang aliba United People's Democratic Solidarity (UPDS) nungi 2013 küm jakzüka aoba lir aser parnok ya Karbi Anglong district nung amenoka liasü.

Mapang tatsüka lir 2018 küm parnoki sorkar den ceasefire sangdong aser iba sülen 2021 küm February ita raraba nungi anen.

(Maneni tapak 3 nung...)



Taküm 2021 küm Dimapur nung alir kaketshirtem rongnung HSLC, HSSLC aser Under Graduates tatidangtem nung tematiba jenjang angurtem (toppers) nem DNSU-i konang tetushi agütsüba sülen parnok külemi agiba noksa ka yangi angur. (Dimapur, Sept. 11, 2021).

# Nimati Ghat rong lendong atema nisung 6 apu



**Guwahati, September 12, 2021 (Agencies):** Nimati Ghat anasa Brahma Putra ayong nung rong mekupokba ken o dak sendakba nung Jorhat police-i nisung trok puogo.

Bodhbar anung dang iba ayong nung rong ka mekupokba lendong nung nisung ana taküm sama aser rong nung amener aika yirua liasü.

Iba rong nung amener rongnung, Bikramjit Kakati, shiba Majuli kübok mozüki ka nung doctor inyaker, pa ano menguteti lir.

Jorhat Superintendent of Police (SP) Ankur Jain-i ashiba agi, iba rong mekupokba ken o dak sendakba nung, temolung magütsüi pei mapa shitak meinyakba ajanga nisung taküm samadaksüba chargers' nung ajemdaker police-i nisung trok puogo.

Police-i pua alirtem ya Dhanbar Das, Jogen Das, Biju

Kumar Das, Jayanta Dutta, Binod Baruah aser Babul Neog ta jangjaogo.

Brehostibarnü, Assam chief minister Himanta Biswa Sarma-i, iba lendong ataloktsüsa mekümdangi inyakertem anema ken o ka benoktsü asoshi Jorhat police dang tetuyuba agütsü.

Senior ketdangsürtem den iba lendong atalokba tesem semdangba sülen, Sarma-i, mezüung bushisüngdangba ajanga angazükba agi, maparen junga ketdang masüba yong iba lendong ataloka liasü ta ngutet, ta ashi.

"Iba lendong atema Jorhat Police dang 'criminal case' ka benoktsü asoshi shiogo. Iba lendong atalokba kuli tejangja bushitetsü asaohi, tanü nikonng dang tashi 'high-level probe' ka sangdongtsü," ta Sarma-i ashi.

Osang ajanga angazükba agi, pua alirtem ya rong anirtem,

teyaritepertem aser iba maparen nung densema alir tangartem dena lir.

Lendong ajuruba nija rong (private boat)nung nisung 90 shi mener liasü.

Iba rong nung mena alir rongnung, nisung ana taküm sama aser nisung ka menguteti lir. Search & rescue operation team-i iba rong lendong nungi jenbur nisung 87 shi ngutet.

Iba lendong atalokba sülen, Jorhat Medical College Hospital nung tetsür ka asü. Tasüla ya Majuli kübok college ka nung tesayur inyaker arishi küm 28 tain Parinita Das liasü. Iba rong lendong nung la kanga mejungi yiruba ajanga la taküm mekümdangket.

Honibarnü, Kaziranga nungi tasü mang tanabuba ngutet. Tasü sang ya Indreshwar Bora ta jangjaogo aser Rajgarh High School nung pa tesayur ka liasü.

# Dibrugarh kübok Tarajan tea estate nung nakmati aruba noktanger

**Dibrugarh, September 12, 2021 (Agencies):** Naharkatia kübok Tarajan tea estate nung ozüing alema nakmati atuba noktanger. Iba ya Dibrugarh district administration-i noktanger.

Iba tea estate nung Criminal Procedure Code (CrPC) nung section 144 ozüing agütsüogo, ta Deputy commissioner-cum-district magistrate Pallav Gopal Jha-i ashi.

Tarajan tea estate ya Tarajan hills tesülen lir aser Digboi Forest Division kübok adener.

Tanga osang ka magütsü tashi Naharkatia kübok Tarajan tea estate nung curfew alitsü.

Nisung kari dang iba tetuyuba alema inyakra IPC nung arlla 188 kübok temerenshi alitsü" ta Dibrugarh deputy commissioner-isa metetdaksü.

Mapang talangka Tarajan tea estate nung ozüing alema nakmati tuyonga arur ta osang ajanga ashi.

Parnoki nakmati miima atuba sülen company tulutem dang ayoker, ta osang ajangasa ashi.

"Iba maparen ya Joypur police station kübok inyaker aser police-i metetaka kecha mashir. Nakmati atuba sülen nisungtemi gari tilala nung bener aoer" ta nisung kati ashi.

# Bodoland Council-i lisopuri atakba süalizütsü



Niz Mugalbecha yimtsüing kübok weaving training centre nung tetsür kati Gamosa atakba yangi angur.

**Mangaldai, September 12, 2021 (Agencies):** Bodoland Territorial Council (BTC)-i sen crore 50 alang lisopurtemi atakba Aronai, Dokhona aser Gamosa tem alizütsü telemtetba agiogo.

Deobarnü, Bodoland Territorial Region (BTR) kübok Niz Mugalbecha yimtsüing nung, BTC chief executive member (CEM) Pramod Boro-i iba osang sangoktsü.

Niz Mugalbecha yimtsüing ya non-BTR arrtsü den Darrang anasa lir.

"Lisopurtemi atakba sü balala alitsü asoshi Assam sorkari sen cr. 200 atakzükja lir," ta BTC chief Boro-i ashi.

"Kasaji, asen Bodoland Sorkari sü ataker lisopur ket (local weaver) nungi sen cr. 50 alang Aronai, Dokhona, Gamosa alizütsü lemtetogo aser iba inyakyim asoshi onoki handloom department den jembishinüdar," ta osangbener den jembiba mapang BTC chief-i ashi.

Iba yimtsüing (Niz Mugalbecha) kübok Kiran Boro ajanga amenokba weaving training centre nung Bodoland

Sorkari bendanga agüja nungitsü, ta Boro-i ashi.

"Iba training centre nung Bodoland Sorkar nungi grant ama sen lakh 10 agütsütsü sangdongogo," ta Boro-i metetdaksü.


Boro-i, iba training centre ajanga lisopurtem indang sempet tali jangjashitsü aser parnok pei kidang nungi meranga inyaka aazüktsü asoshi yariba den külemi yimtsüing nung rongsenketzüng jenjang ajungkettsütsü imlar, ta lemsatet.

Kasa anogo (Deobar), Pramod Boro-i iba training centre - Xipini semzükja liasü. Iba centre nung, tawa tanü amshiba loom 10 shi Kiran Foundation kübok amenoka lir.

Kiran Foundation, ya Mrs Universe Exclusive 2017 (South Africa) aser entrepreneur Kiran Boro-i la tasoli nung amenokba Foundation ka asütsü.

Maneni, iba centre lapokba sentong nung, BTC deputy chief aser Udalguri MLA Gobinda Basumatary na densema BTR nungi tongtibang nübu balala aruagi denogo.

# Manipur assembly election nung NPP-i menden 35 nung tokteptsü



**Guwahati, September 12, 2021 (Agencies):** Sangküm Manipur assembly election nung National Peoples Party (NPP)-i menden 35 nungi tokteptsü.

March, 2017 Manipur

Manipur unit NPP working president aser MLA Jayantakumar-i ashi.

Manipur kübok tenemlen aser lendenlen nung candidate aika toktepdaksütsü ta Jayantakumar-isa ashi.

Honibarnü Meghalaya chief minister aser NPP president Conrad Sangma-i Imphal semdang aser iba mapang Manipur Assembly elections indang onüktem lemsatet.

Manipur nung taruba sorkar nung NPP-i tongti shilem agitsü ta Jayantakumar-i osangbener dang ashi.

assembly election nung NPP-i menden 60 nungi 4 nung takok ngua liasü.

"NPP party president Conrad Sangma den jembitepba sülen candidate kwi ka tokteptsü'ar lemtetsü" ta



Deobarnü Minister of State for External Affairs and Education Dr. Rajkumar Ranjan Singh-i Sikkim Chief Minister Prem Singh Tamang den Mintokgang nung par kidang ajurutepdang agiba noksa angur. Iba senden nung tenati North-East region aser Centre tsüngda tesentaktep akangshitsü aser terenlok atema inyaka aotsü onüktem lemsatet. (Mintokgang, September 12)

# Küm ti sülen Assam... (TAPAK 2 NUNGI...)

Osangbener den jembiba mapang, sorkari region nung yimjung bener arutsü asoshi merangba aser Karbi Anglong nüburtemi mapang talangka nungi akhangba ataloktsütsü merangba asoshi UPLA lenirtemi pelaba lemsatetpa liasü.

"APHLC aser Karbi Anglong nung aliba lokti tentet 24 dak temai sangdongba nung mesüi peace accord nung meyongnem agütsüba ajanga Autonomous State akhangba manener. Stat meshiba ken o jembitsü atema kishi lapoka lir aser democratic yimya nung

maneni lenmang bushitsü," ta UPLA chairman Sorjon Lo-eh ajanga ashi.

Lokti tentet 24 dak temai anema nokdakba asoshi asüngdangba ka langzüba mapang, "Nok-o-nü amer raraba ajanga stat mongutetsü ta onoki angatet. Jembishinüba ajanga dang mapang talangka nungi aliba tebilemetsü ya angateteptsü," ta UPLA chairman-i ashi.

"Lokti tentet kari nüburtem rongnung olulu tiazü prokshia yimtenren tsütsü tajangzük agitsü meranger," ta paisa ashi.



## TIR YIMYIM YIMOBILEM (EDITORIAL)

DIMAPUR TENTONÜ, RONGJUI(SEPTMBER) 13, 2021

### Nagaland nung angh

**T**aoba hopta nung asenok iba osangkaket nung "Nagaland angh R.N.Ravi melen nunga koma süla?" ta bilemdanga aliba mapang, asenoki meteta ali amato, Nagaland angh R.N.Ravi Nagaland nungi Tamil Nadu-i yokogo aser pa melena tangar ka meshim tashi Assam angh Jagdish Mukhi-i Nagaland repranga atatsü nungloksüogo. Atangji, koba state nung südir süaka, state government nung mepetmesü timtem melira angh-i tashi amshitsüsa lenmang sadema mali, pa mesüra laji center o state na tsüngda o tongdar amai ka dang lir. Ajisüaka, ano inyakdi süra angh-i state government mapatem ajak mita inyaktsü koka lir, kechiyong, tenüng agi asüyonga, paji state nung tekolak aser state government-i inyaktetba mapatem ajak pai küm shia nübortem nem metetdaksütsü. Aji oda, state nung angh ya tsürabur, tanüker aser terepranger amai lir, anungji angh dak nübortem meimba shisatsü lira, pai mesüra lai akok tashi state government mapatem ajak reprangshiranga shitak inyakdaksütsü merangtsü. Nagaland angh, R.N.Ravi daka iba ama nübortem asoshi government nem mapa shitak inyakdaksünüba shisatsü liasü. Atangji, pa Nagaland-i arur küm anashi dang, anungji pai ano Nagaland-a ajunga mangu dang oadoker. Ajisüaka, Naga nung asoshi R.N.Ravi tenüngji tasen masü, ajurua mejembidangaka, paji ajaki meteta lir, kechiyong paji 2014 küm nungi Naga nung yimten nüchiso bushirtem den India government tenüng nung ajurua jembitsü asoshi shimtetba lenir (interlocutor) ka liasü. Atangji, pa Naga nung linük tenzükerkem den jembitsü shimlibo NSCN-IM teloki paji maginüi liasü, kechiyong pa ya Naga nung yimten nüchiso bushirtem mapa anema jembiba aser züluba nisung ka liasü. Ajisüaka, paji agitsüsa aküm aser yakta dang 2015 küm August 3 nü India government o NSCN-IM na tsüngda Naga yimten tebilemtsü latettsü atema arla ken o 'Framework Agreement' renem aser iba sülen Naga nung tanga linük tenzüker teloktem (NNPGs) den 2017 küm November 17 nü Naga yimten latettsü atema tangatetep ken o 'Agreed Position' lateta ayu. Iba tashiji Ravi-i Naga nung yimten telok ajak den kanga junga ken o jembia aruogo. Ajisüaka, kodang NSCN-IM teloki Naga nung temzüng aser wako balaka amshitsü ken o benok, iba nung jagi Ravi o NSCN-IM na tsüngda mangatetep adok aser majurutepteti kuma adok. Atangji, tang tashi mangatetba kaji 2015 küm Frame work Agreement renemba ken o ya yimjak nung mesayui mim ken o ka ama talangka rezünga yur külenang yimjak nungbo metetdaksü. Iba jagi balaka, tang tashi, ken o tatem kuma mejembitet timtemer südi ta bilemer. Atangji, Naga yimten onük jembitsü asoshi shimteta aliba nisung ka state nung angh yokbaji center-i mangateti inyakba mapa ka liasü. Ravi ya Naga nung den jembitsü atema shim asünungji, aser telok ajak den ken o renema jembir asünungji, Naga nung alidak Nagaland nung lia Naga yimten ken o tembanga jembitettsü ta center government-i bilem südi. Ajisüaka, state nung angh-i temzüng ozüng shitak amshitsü yoker, anungji aiben yimjung o mejembitettsüsa kuma adoker. Aji oda, Ravi angh kümer külenbo pa den Frame work Agreement aser Agreed Position sign asürtem kasa nisungtem dang pai ashir auer aser rakzükratemer telok ta ajaba asenoki angashiogo. Atangji, Ravi ya Nagaland asoshi angh tajung ka liasü. Paiang highway lenmangtema repranga inyakdaksü aser akok tashi yimsüsür aser ketdangsertem dang ochishia nübortem tenzüksü saksalemdaksüba asenoki angashiogo. Iba amaji, pa melenba yaa Naga nung atema ano mapang tajungba ka arutsü asoshi Tsüngremer sentong ka südakjangma ta sarasadema atar.

## OLEMSABANG

### Khristan Tamang den Sobaliba Liromedem

~ Ayutemjen

Hoi sabangpur, Tsüngremong Benjong amongtsüba asem (drum) tema tenzüko. Aikati Aor ajak Khristan kümadoker asü nung joko limapur sobaliba meinyaktsüla, amadoktsüla, benjongbentsü mamongtsüla ta jembir. Yim kar nungbo süngkonga mayutsü ta ser endokogo. Yim kar nungo amai ayutsü yimtaki bener adokdang Pastori sarasadem masütsüla ta ashishitep o aika jembio. Tetsü-tebou ken matentesüla, yar tsüngsang nung shilem magitsüla, Tsüngkotep jacket (vest) semer sayutsüngi masütsüla. Asenok aikati temesüng nungeri inyakba sobalibabo kecha mashishi agizüker, aser temesüng nunger sobaliba ya Khristan yimsü amai bilemer. Ya tai tangatetba lir. Asen sobaliba tajungtem koda wazüka ayutsü? Khristan tesayuba nung tzüsenshir koda benjongbentsü (Tsüngremong, Moatsü) aser sobaliba ajanga Tsüngrem sentsüwangshidaksütsü? Sobaliba tamajungtem kobai lokti rajang kümdaksür itemji melenshir tejakleni aotsü?"

Iba onük ya July 29, 2021 züngia nungi Yanglushidi Sensaksem Sabang (YSS) shisalemsateptsü atema benloka sensaksem aka. Onüki meshiba ama züngsem aikati shisalemsatepogo. Lemsatepba nungi kü shisatsü yari KHRISTAN TAMANG DEN SOBALIBA LIROMEDEM ta ser Tsüngrem dang sarasadema tangatetba kar lemsatepa zülur.

#### Yisu Khrista aser Sobaliba

Yisui Sobaliba ajungkettsü: Yisu Khristaji Tsüngrem chir aser kasem nung Tsüngrem ka ta asenoki amanger. Pa sor alima nung mapang tatsüka alidang Tsüngrem amaji dang shisang shisanga alitsü koka liasü. Saka Pai alima sobalibaji akhüm keta dang amshi. Pa Tsüngrem süaka par Yihuda nung sobaliba nung yintetba kuli kar:

- \* Tinübuba nung pa mejeptok
- \* Par sobalibai melaba ama küm 30 majung tashi yimjak nung mokarai ali
- \* Teshimet nübu ama (Nazarene) Pa kolak nung kusünok matalok
- \* Yihuda nung ama Pai sobulemtsü shitak sobu aser par oshi agi jembir.
- \* Ali chuba nem saru agütsütsüji tim sobaliba liasü, anungji Yisui "Kechi Kaiser meyong aji Kaiser nem agüjang aser kechi Tsüngrem meyong aji Tsüngrem nem agüjang." ta ashi.

#### Iba yagi sobaliba tajungji metentsür.

Yisui Sobaliba aitsü: Koba sobaliba tamajung lir, item anemajibo Yisui taitüsü agütsü. Sabbath anogo nung kecha meinyaktsü par sobaliba liasü saka Yisui anebtsü aser Osangtajung, mapa tajung atema jaja. Nüktapangtatsür lung agi onseta endoktsü par sobaliba liasü saka Yisui kümzük. Yisui item mapa tajung inyakba agi Tsüngremi temenenpur meimer aser kümzüker ta tangatetba tajung sayua sobaliba tajung tenteta yutsü. Item ya Yihuda nungertem asoshi sobaliba anema Yisui inyakba lir. Sobaliba tamajung anema jembidang kar dangbo tiyazü ta aja, kar dang anemsübatem, kar dangbo mojing chirtem ta jaa artsü. Tenlakidang par sobaliba kümer shishilempaba ngua Yisui ain adoka shishilempaba langbang meküpdoktsü aser parnok aridok.

Ibai mesüka asen sobalibaren nung tajung aika dang lir, itemji asentenshitsüla aser tajungba nung ajungkettsüla aser tamajungtemji entoktsüla. Iba yagi aseni amangba Tsüngrem sentsüwangshidaksür.

#### Khristan tamang den sobaliba liromedem

Ibai tajungba nung angatetsü atema shilem asem kümer lemsateper, itemji:

1. Libaliroyim
2. Benjongbentsü/Ampngtsümong
3. Tekülem/Anempong

#### Libaliroyim

Küm ishika tejaklen arogo nung tetsürtemi asen tetsü tebou kensü nung gospel ken ka atenba (fusion style), aji Tsüngremi mepelar tatok nangzükan ta ashi. Nebo tekülem nung asen tetsü-tebou kensü enoka külemba nung kecha tai mali ta belemer... Ano Aor benjong-bentsü awazüka ayutsüla saka Khristan tamang arurji koba Tsüngrem tsüngdang magizükteter itemji mebenshitsüla. - Alila Longchar

Asen Tsürabur sobaliba tai mesüra temenen kümja arubaji asenok ajaki meteta lir. Pongmang nunga süng asen sobosolemtsü sobur pongmang nung temeneni arishir mesüra temenen kar meindokjem lir ta rattetsüba ajangshiogo. - Matsüng Longkümer

Iba tangatetba jagi sen sobalibaji temenen amai bilemer. Ya tai ta angatetdi.

Sobalibaji Tsüngremi asen nem moatsüba senmang lir. Taküm libaliroyim nung anogo shia kija taküm aser lokti nung tim libaliroyim indang angatetdaksür, itemji:

- i) Oshi-oben
- ii) Tim kibalembuba
- iii) Tain dang akhüm tsübuba
- iv) Subosolem shitak suboba
- v) Tajayim shitak ajaba (Odi, oya, oko, anük...)
- vi) Yar tsüngsang
- vii) Wain-shin
- viii) Achi ajemba/Chiyungtsü
- ix) Kenten-menü
- x) Lenpitsüla... yamala

Item ajakji meteta timi mesamai benshibaji kanga tongtibang lir. Ajakjibo rasa-a mashir saka item rong nungi kar tera rasa-a lemsateper.

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

## Khristan film 'Show Me The Father' sayaogo



**September 12, 2021:** September 10 nü Khristan film 'Show Me The Father' sayaogo; iba film nung tebutemi kodaker Tebu agizükba ajanga tanurtem dang tatishtüsü tajung sayuba kuli aika lir, ta osang ka ajanga metetdaksü.

Iba film ya Khristan film yanglurtem- Alex aser Stephen Kendrick nati yangluba mezüngbuba documentary film ka lir. Laishiba nung tebu tajung ka asütsü atema shia aliba Lai otem nung ajemdaker iba film yangluogo.

Kendrick adianui yangluba

film nung adianu- Stephen aser Alex na, NFL coach aser saisapongertem aser Pastor Tony Evans nungeri tongti shilem agir. Film nunggi tebutem ajakji taküm otsü balala aser lenmang balala nung jajar, ajisüaka tatamsa parnok ajaki kodaker Tebu ajuruba indang otsü lir.

"Tebu ajak otsü balala lir, ajisüaka tebu tajung ka asütsü aser tangara ajungmesotsü atema kari dang taküm melenshir," ta Stephen Kendrick-i metetdaksü.

"Tanü aima nung tebu ka maliba kibong nung teraksa lir, ajisüaka Tsüngremji tetemsü

Tebu ka lir aser taküm nung mapang ajak nung Pai temeim aser taneptsüba agütsür," ta pai ashi.

Film nunggi NFL Seahawks coach Sherman Smith-i, tebuti pa taküm nung temelenshi adokdaksüba indang lemsateper, ajioda Smith-ia tebu tajung kaka asütsü atema saisaponger aika ajungshir.

Focus on the Family Tir, Jim Daly-i pa tebu maliba, yi ajemba kbong ka nung intetba aser lanuwa pai timtem balala ajangshiba lemsateper. Saisapong ajanga tatamsa pai Tebuti Tsüngrem shimmer.

Christian Post den interview ka nung jembidang Stephen Kendrick-i, "Show Me The Father" film ya sarasadem ajanga Tsüngremi ajungshiba lir, ta metetdaksü.

Alima nung tang tashi coronavirus wara lir, ajisüaka taküm December ita tashi nung Khristan film 12 shi sayatsü, aser item film rongnung 'The Jesus Music' film (October 1 nü sayatsü), 'Courageous Legacy' film (October 15), 'American Underdog: The Kurt Warner Story' film (December 10) aser 'God's Not Dead: We the People (fall)' film (October 4-6) densema lir.

## ANO GO ABEN TSÜNGREM DEN

### Asenok temeimi rongmesoba

O temeshi Oba, alimai na memetet, saka ni na metetet; aser Nai ni yok ta item yagi metetet: aser ni parnok nem Ne nung metetdaksü, aser ano metetdaksütsü, anungji kechi temeim agi Nai meim aji parnok dak alitsü, aser ni parnok dak alitsü. Yohan 17:25-26.

Nai Tsüngrem yimlji metetet; nai Tsüngrem yimlji noktanger. Pa temeimi ne dak mekongshi tashi na Tsüngrem anasa alitsü makok. Kotaker Tebuti Techir dang tatem maka temeimi meim. Tebuti temenen lima temulung raksaa meimba Pa jabasoi Pa taküm ajanga jungkai adoktsü. Tebuti meimchir kümzüksü sentong atong aser Techiri mapaji agizük. Iba jagi Pa kangki dongi ani.

Yisu meimchir rongnung jajadang, Tebu temeimi par chir süngdaksü. Mashite temeim agi Pa kangki atutsüsa majungshitsü ta Yisui metetta liasü. Meimchir temeimi Pa taküm ajunga agi Tebuti ashiba abensaa tashi angatsü makok ta Yisui angatetta liasü. Tebu tekümtet mapa sentong nung Pa taküm bendanga agütsütetsüsa Tebu temeimji dang tashi tait liasü.

Kasa temeimji nütsüngtem nema agütsütsü Yisui sarasadem. Tebuti parnok nem agütsütsü aliba mapa atemaji tanga tajung shibaji teperi masü ta Yisui metetta liasü. Tsüngremer telangzúbaji Par chir parnok dak lidaktsütsüsbaji liasü. Khristan ka asoshi pa temeimer agi sünger Tsüngrem den Pa mission nung malitsüsbaji tamakoktsü.

Pa temeimi sünga melira nai shinga dang Tsüngremi na yok ta kuli mesütetsü. Nai tangar dang tai metoktetsü aser talila mile moutetsü mesüra tangar asoshi tenla magütsütetsü. Item ajak inyaktetsü asoshi na mezüngbuba Tsüngrem temeim agi sünga alitsüla. Tebuti aser Pa masadangtetba temeim bushiang; aji sür na ajanga tangar dang meimtsü Techir dang melaang.

## Khristan putir, asür Stan Swamy indang kaket ka sayaogo

**New Delhi, Rongjui/September 12 (Agencies):** India nung meimchir temeden atema inyaker aser tribal nisungtem atema ola adoker Khristan putir, asür Stan Swamy indang kaket ka September 10, 2021 nü New Delhi nung sayaogo.

Pa police ket nung lia taküm July ita nung asü.


'Fr. Stan Swamy: A Maoist or a Martyr?' kaket ya Khristan putir, Prakash Louis-i zülu aser iba kaket sayaba sentong nung meimchir temeden atema inyakerkem, osangbenertem, yimten lenirtem, shisashirtem, lawyers aser lokti tentet balala nung lenirtem aden.

Tapak 266 keta aliba kaket ya New Delhi nung aliba Media House aser Kolkata nung aliba Sahitya Pravarthaka Co-operative Society nati adoktsü.

Iba kaket zülusang, Louis-i iba kaket nunggi Stan Swamy indang taküm otsü aser pai inyakba mapatem indang shia lir.

Stan Swamy-i federal state sorkar atsüngdoksü nükjidong nung Maoists telungpurtem den longjemer inyaker, ta pa nem tai tonglokja yaküm October ita nung Ranchi (Jharkhand) nung pa apuba sülen pa arrshi küm 84 lia asü.

Unlawful Activities Prevention Act (UAPA) ozüng kübok Swamy den tangar nisung 15 apu. Kaket sayaba sentong nung jembidang Louis-i, Stan Swamy-i timtemertem atema nendaka inyakba mapatem bilemtetsü atema ni iba kaket ya zülu, ta



September 11, 2021 nü New Delhi nung 'Fr. Stan Swamy: A Maoist or a Martyr?' kaket sayaba sentong nung putir, Prakash Louis-i jembiba noksa nung angur.

metetdaksü.

Swamy-i tribal nisungtem temeden atema inyakba ajanga pa tepset, kechiyong ibaji state atema amokmeren ka liasü, ta paisa metetdaksü.

"Ni iba kaket ya tribal nisungtem nungtem nung adoktsür, kechiyong Swamy ajungmesortemji parnok liasü," ta pai ashi.

"Ni iba kaket ya tribal nisungtem, tribal nisung pusemer- loktiliba lenirtem, meimchir temeden atema inyakerkem, yimten aser sobaliba ajungkettsürtem nungtem nung adoktsür, kechiyong parnoki tribal nisungtem, Dalit nunger, minorities aser backward kintem temeden atema inyaka aruogo,"

ta Louis-isa metetdaksü.

Putir Louis ya Jesuit-i ketdangsuba Indian Social Institute nung executive director inyaka liasü.

Iba kaket nungsa Swamy ya ozüng kübok alir ka, yimjung meimer ka aser ochi jembiba senso ka liasü, ta kuli asüba aika shia lir.

Kasa sentong nunggi kaket zülur aser tribal atema inyaker, Gladson Dungdung-ia jembida.

Dungdung-i, India sorkari tribal nisungtem indang legal aser sobaliba temedentemji kiralongra mapatem ama züngshir, ta ashi.

Institute for Human Development nung professor, Virginius Xaxa-i, "Swamy-i Jharkhand aser Bihar nung

lenirtem mali, ta bilema pai tribal nisungtem temeden atema jembiba aser Pathalgari movement tenzükba ajanga pa tepsetogo, kechiyong itemji state atema amokmeren ka aküm," ta metetdaksü.

Jesuit putirtem aser meimchir temeden atema inyakerkem ashiba agi, Swamy den tangartem BJP-i aniba sorkar anema jembiba atema parnok ola nembangtsütsü asoshi police-i parnok anema tiyazü kuli agütsü.

Kasa sentong nung jembidang MP, Abdusamad Samadani-i, "Asenoki asen teinyaktsü mapa nungi jena maotsüla aser ochi ola adoktsüla, ta Swamy taküm ajanga asenok maneni ajungmesotsü," ta ashi.

Tamalen United Nations-ia India nunger putir, Swamy jail nung lia asüba atema aija liasü. Jesuit putir, Swamy ya Indian anti-terror ozüng kübok ita 8 tashi tepuokdak liasü, aser pai bail meshiba temepishiba angadangtsü lia pa asü.

Swamy-i tribal nüburtem temeden atema inyaka aru aser 2018 küm pai India nunger kin balala tsüngda rara adokdaksü, ta pa nem tai tonglokja yaküm apu.

Swamy ya Parkinson tashidak densema tashidak balala agi shiranga liasü saka pa nem bail magütsü jail nung ayu. Taküm May ita nung pa dak coronavirus tashidak putetba sülen pa hospital nung treatment agi aser tesüsa temelungjang tashidak timtem adoka liasü.

India nung Unlawful Activities Prevention Act (UAPA) ozüng ya longkak aiterkem, osangbenertem, kaketshirtem aser tangartem anema amshia aika puogo, aser iba ozüng ya melung masürtem ola nembangtsütsü atema lir, ta aikati ashir.

UN aser UN independent mongintem tesüiba küm asem tashi putir Stan densema meimchir temeden atema inyaker 15 atema India sorkar den jembida aruogo, aser ken o mangadangi tepuokdak alirtem chiokang ta takhangba agüja aruogo. Parnokisa UAPA ozüng amshiba atema tebilemtsü akaba lemsatepa aruogo.

Putir Stan Swamy-ia India nunger court nung UAPA ozüng anema jembida aruogo.

**OLONG PAITEP # 5935**

1			2			3		4		
					5					
		6								
							7			
		8								
9										10
				11		12				
13										
14						15				

**TIPIEN**

- 1. Chiyungtsü oksa - (5)
- 3. Tatalokbatem - (5)
- 5. Tama - (6)
- 6. Pei meyong aküm - (3)
- 7. \_\_\_\_\_ bang - (4)
- 8. Kinungpurtem - (7)
- 9. Nokdak masü - (4)
- 12. \_\_\_\_\_ la - (3)
- 13. Ochi masü - (6)
- 14. Yagi Sü ataker - (5)
- 15. Temadok - (5)

**LANGTSÜNGLEN**

- 1. An tetsü - (5)
- 2. Juzüa senzüba shiruru - (7)
- 3. Tamendakdak - (4)
- 4. Tiak-asang - (6)
- 7. Tasa - (7)
- 8. Süngjang telung nung aliba - (6)
- 10. Ibai masü - (5)
- 11. Ano mamen - (4)

**OLONG PAITEP # 5934 TELANGZÜBA**

**TIPIEN :**

- 1. Semtu, 3. Lepko, 5. Bilem, 8. Ulu,
- 10. Tsünpang, 11. Tesangwa,
- 13. Aoksa, 15. Putir, 16. Yipru.

**LANGTSÜNGLEN :**

- 1. Sayu, 2. Teb, 4. Kimong, 6. Lungkak,
- 7. Milak, 9. Zünga, 10. Temopu,
- 12. Walu, 14. Ali.



**ALOKBA CLASS NUNG MEJANGER :**

- Missla** : Alokba, na kechiba class nung mejanger.
- Alokba** : Ayaya Miss, nü ola ya onsarasa anangba agi memeteti dang amoa or alir aja.
- Missla** : Sürapangla nü medemertembo kechiba memejanger?
- Alokba** : Parnoki ni temulung agüjaa angaba amaji angaa malir nung koda?
- Missla** : Oh Alokba!

Lilir : WhatsApp



**TENÜNG**

**: AOCHIBEN IMSONG**

- Tasoba Anogo : September 13, 2009
- Küm : 12
- Class : Non-Verbal Autism
- School : GPS Lerie (CSWN)
- Talidak : LFS Area, NMH Kohima
- Tsüngrem Taochi Jala Aochiben Imsong asoshi teperi. La taküm lidaktsüba yong, kenüamati tenüngsanga küm 12 abensar.



- Tsürabur aser Adianutem

**AO OSHI ANGAZÜKDAK:**

**TANÜ ANGAZÜKTSÜBA OJANG**



**Kümbok**

(n) milenpong yanglua amshiba süngküm tila ( type of reed)

\* Akhi mapangbo aonung **kümbok** milenang amshi.

**Kümüli**

(n) jaklaliru ( temper)

\*Moaba **kümüli** tajung asüba agi aremzüker.

**NAI-A YA METETTER MA?**

**AUGUST 2021' NUNG SAYABA SMARTPHONE KAR:**

- Infinix Smart 5A - Rs 6,499
- Tecno Pova 2 - Rs 10,999
- Nokia C20 Plus - Rs 8,999
- Vivo Y53s - Rs 19,490
- Samsung Galaxy Z Fold 3 - Rs 1,49,999
- Samsung Galaxy Z Flip 3 - Rs 84,999
- Samsung Galaxy A12 - Rs 13,999
- Motorola Edge 20 - Rs 29,990
- Motorola Edge 20 Fusion - Rs 21,499
- Realme GT 5G - Rs 37,999
- Realme GT Master Edition - Rs 25,999
- Samsung Galaxy A03s - Rs 11,499
- Vivo Y21 - Rs 13,990
- Vivo Y33s - Rs 17,990
- Realme C21Y - Rs 8,999
- Samsung Galaxy M32 5G - Rs 20,999

**TANÜBO NAI LANGZÜANG**

Q. Philippine Eagle indang IUCN Status ji \_\_\_\_\_ lir.

A.Endangered B.Critically Endangered C.Vulnerable D.Extinct

\_\_\_\_\_ (Taruba adok nung onoki langzüsü)

**YASHI ADOK TELANGZÜBA:** India

**SUDOKU # 5976**

	8	1								
	9	7		8	1					
		6	7	9	3	1		4		
9		5	6	2						
6	4		1			8				
					5	7	9	6		
	2		8							
	6	9				3	8			
5					4			2		

**TELANGZUBA # 5975**

	4	3	5	8	9	7	6	2	1
	8	1	6	4	2	5	9	7	3
	2	7	9	6	3	1	5	8	4
9		5	6	2			1	5	2
6	4		1			8			
							6	4	7
							2	1	8
	3	6	8	1	5	4	2	9	7
	7	9	4	3	6	2	8	1	5
5							5	2	1

**OJANG LUTEP # 5521**

- EPI :
- SASA :
- ANMERGA :
- ERAS :
- ISHOCHIA :
- AKEINYR :
- AJAÜKBNGZATEM :
- NGKAA :
- GIA :
- UNGTAJBA :

**OJANG LUTEP TELANGZÜBA # 5520**

**KANGA JUNGA INYAKA ARUR SÜLEN TARAK TILAKA AJANGA MAPA RAKSADOK**

**TAN HOPTA ATEMA - KOMA SÜLA ?**

Q. Jammu& Kashmir amato Nagaland state agi Union Territory-ang ana kümtsü nunga koma süla ?

### Gujarat Chief Minister menden atema Bhupendra Patel shim



September 12, 2021 nü Gandhinagar nung aliba BJP headquarters nung senden ka amenba sülen Union Ministers- Narendra Singh Tomar, Bhupender Yadav aser Prahlad Joshi, taoba Gujarat chief minister, Vijay Rupani aser State BJP Tir, C.R. Patil nungeri Gujarat Chief Minister menden atema shima alisang, Bhupendra Patel (abelen nungi tasembuba) den tangokba noksa nung angur.

### New Delhi, Rongjui/September 12 (Agencies):

BJP lenir, Vijay Rupani-i Honibarnü Gujarat Chief Minister menden nungi anenba shidi agüja liasü aser Amongnü BJP-i party MLA, Bhupendra Patel Chief Minister menden atema shimogo. Amongnü Gandhinagar nung BJP Legislature senden amenba mapang nung Bhupendra Patel chief minister menden atema shima liasü. Iba senden nung adentsü atema BJP-i Union Minister ana- Narendra Singh Tomar aser Prahlad Joshi na party

central observer ama yoka liasü. CM menden atema Patel shimtsü asoshi taoba chief minister, Vijay Rupani-i pa tenüing benoka liasü. Patel ya Ghatlodia constituency nungi BJP MLA lir. 2017 küm Gujarat Legislative Assembly election nung pai Congress candidate, Shashikant Patel madak takok ngua liasü. Pa Ahmedabad Municipal Corporation aser Ahmedabad Urban Development Authority nunga inyakogo. Sangküm December ita nung assembly menden 182 aliba Gujarat nung election

agitsü lia Honibarnü Rupani-i CM menden nungi anenogo. Honibarnü Vijay Rupani-i state Angh, Acharya Devvrat ajuru aser pai Gujarat CM menden nungi anenba shidi agüja liasü. Osangbenertem den jembidang pai, "Lenir tasen ka kübok maneni state nung terenlok mapa inyaksü atema ni Chief Minister menden nungi anentsü telemtetba agi," ta metetdaksü. Tesüiba ita trok tsüingda Rupani densema BJP nungi Chief Minister pezü CM menden nungi anenogo.

### BJP-i nangzükyonga Women's Reservation Bill magizük: TMC

Kolkata, September 12 (Agencies): Amongnü Trinamool Congress nungi Rajya Sabha MP, Derek O'Brien-i, 2014 küm Lok Sabha election nung BJP-i Women's Reservation Bill agizüktsü, ta nangzüka liasü saka parnoki tamakok nguogo, ta aitsü. Küm aika tejaklen Parliament nung Women's Reservation Bill benokba sülen küm 25 ajungba anogomong nung TMC lenir O'Brien-isa pai tamalen Rajya Sabha nung iba onük jembiba video ka twitter ajanga lemsatop. "Parliament nung WOMEN'S RESERVATION BILL benokba sülen tanü küm 25 ajunger. Küm 25. Bill kecha magizük. MODI-SHAH-i aniba BJP-i 2014 küm election

manifesto nunga nangzüka liasü, saka tamakok nguogo," ta pai twitter ajanga metetdaksü. Iba Bill ya agizükra Parliament aser state assemblies nung tetsürtem nem menden shilem 33 shiteta/wazüka yutsütsü. O'Brien-i tamalen Rajya Sabha nung jembiba video nungji pai, alima tesem ajaklen legislatures nung tetsürtem nem menden shilem 25 lemezükja lir, saka asen linük nungbo average ji shilem 13 dang lir, ta metetdakja liasü. Parliament nung BJP nungi tetsür MP tem shilem 10-11 shi dang lir, ta pai ashi. TMC national otongdar, O'Brien-isa, BJP den medemdangra Trinamool Congress nungibo Parliament

House anaprongla nung tetsür MP temji shilem 40 jungnüa lir, ta ashi. Ano tanga osang ka nung, interview ka nung jembidang Communist Party of India (Marxist)'s politburo züingsem aser taoba mapang MP, Brinda Karat-ia, Parliament nung Women's Reservation Bill agizüktsü atema kechiba sorkari majority tashi mamshir?" ta asüingdang. "Iba bill ya agizükdir sürbo agizükttetsü. Iba bill benoka o lemteptetsü aser agizükttetsü. Centre sorkari mapa inyakertem anemba bill aser aluyimertem anemba bill tembo agizükttetogo, süra kechiba sorkari tetsürtem bill agizüktsü atemabo majority tashi mamshir," ta lai ashi.



New Delhi, September 12, 2021: Tetsürtemi Women's Reservation Bill akhangba sülen küm 25 ajungba anogo nung New Delhi nung tetsürtem temeden atema inyaker, Syeda Hameed aser Annie Raja na den tangartemi poster tasen sayaba noksa nung angur.

### 'Transforming UP' ad. nung Kolkata flyover noksa amshi: TMC

Kolkata, September 12 (Agencies): Amongnü Trinamool Congress-i, Uttar Pradesh state sorkari chief minister, Yogi Adityanath kübok state nung terenlok aliba sayutsü atema Kolkata (West Bengal) nung aliba flyover noksa amshi, ta aitsü. Iba noksaji Kolkata nung aliba flyover ka noksa asü masüar mejangja, ta shia West Bengal BJP-i, Uttar Pradesh sorkari expressways yanglur aser West Bengal nung Mamata Banerjee yimsüsüba kübok yangluba flyovers chireper, ta aitsü. "Transforming Uttar Pradesh under Yogi Adityanath' nungja nung adokba advertisement noksa nungji rong anüing sentsü aser temesüing tepa aliba flyover ka lir. Sentsü ana ya Trinamool Congress sorkari kanga bulua amshiba sentsü lir. Advertisement nungji yamai zülua lir, "2017 küm matongdangbo Uttar Pradesh nung investment atema temelung magütsü liasü, saka pa (Yogi) yimsüsüba kübok küm pezü ser tesadang nung temelenshi adokogo aser 2020

küm nungbo linük nung rongsenkettsüing tulutiba jenjang tanabuba aküm." UP nung terenlok sayaba advertisement nung West Bengal nung aliba flyover noksa amshiba dak sendakba nung Trinamool Congress-i, "Mamata Banerjee-i aniba sorkar kübok terenlok alibaji BJP-ia agizüktteter aser ibaji amshitsü merangogo," ta aitsü. TMC national general secretary, Abhishek Banerjee-i twitter ajanga, "@myogiadityanath atema UP melenshir tetezü @MamataOfficial leniba kübok Bengal nung aliba terenlok noksatem parnok meyong ama amshiba lir! BJP tashi taittiba aliba state nung gol ana aliba model tamakok nguogo aser tangbo ibaji jungkai adokogo," ta metetdaksü. "@narendramodi-i par party kümzüktsü atema Chief Minister tem melener. Pai-a MamataOfficial leniba kübok terenlok mapatemji pai inyakba ama amshitsüla," ta TMC lenir, Mukul Roy-i twitter ajanga metetdaksü.



September 12, 2021 nü New Delhi nung Purola (Uttarakhand) nungi Congress MLA, Rajkumar BJP nung adenba sentong nung tangokba noksa nung angur. Kasa noksa nung Union Minister Dharmendra Pradhan aser Uttarakhand CM, Pushkar Singh Dhami nata angur.

### Pegasus ken o bushisüingdangtsü temepishiba SC-i angadangtsü

New Delhi, September 12 (Agencies): Pegasus ken o bushisüingdangtsü atema temepishiba ken o kar benoka lir aser item temepishibaji Hombarnü Supreme Court-i angadangtsü. India nung Israel nunger spyware Pegasus amshia tongtibang nisungtem aika itdangitba ken o nija nem bushisüingdangdaksütsü atema temepishiba ken o kar SC nung benoka lir. Pegasus ken o dak sendakba nung September 7 nü Chief Justice N V Ramana-i aniba bench-i Centre sorkar nem mapang agütsüsema liasü. Iba ken o dak sendakba nung tamalen Centre sorkari affidavit ka agütsüogo. Solicitor General Tushar Mehta-i Supreme Court dang, timtem kar ajangshiba ajanga tanabuba affidavit renemtsü atema pai ketdangsertem majurutet, ta metetdakja liasü. Centre-i mezüingbuba affidavit ajanga SC dang, iba

ken o dak sendakba nung Parliament nung Information Technology Minister, Ashwini Vaishnaw-i sangdong ka agütsüogo, ta metetdaksü. "Onoki mezüing agütsüba affidavit nung ajak shia lir. Iba ken o ya onok tangatetba tsütsülen nungi reprangshidaksüner, kechiyong affidavit nungji ajak peria shia lir," ta law officer-i SC bench nem metetdakja liasü. West Bengal nung Pegasus amshia tongti ketdangsertem itdangitba ken o bushisüingdangtsü atema July 27, 2021 nü West Bengal sorkari taoba mapang SC judge, Madan B Lokur leniba nung Lokur commission tenteta liasü, saka iba commission thinenttsü atema Supreme Court nem temepishiba ken o ka agütsüba dak sendakba nunga SC-i Centre sorkar aser West Bengal sorkar naprongla dang nungi telangzüba meshiogo.



Mexico City tezülen Tlalnepanla tesem nung story asem atongtepa süa aliba ki ka long agi nangbanga aliba noksa ka yangi angur. Nisung jenti aliba Mexico City tezülen iba tesem nung Hokulbarnü long tulu mekazüka aluba sülen nisung ka asü aser ter samar bushir.

## Tetsürtem temeja kaketshisatsü angazüktettsü: Taliban

**Kabul, Rongjui/September 12 (Agencies):** Afghanistan nung tetsürtem post-graduate densema university tem nung maneni kaket shisatsü angazüktettsü, ajisüaka classroom tem tetsür aser tebur balala amentsüla aser Islam yimsüi tuyuba ama sobosolemstüla, ta Taliban sorkar kübok higher education minister-i Deobarnü metetdaksü.

Afghanistan nung yimsüsür tasentemi tetsür medeni sorkar ka tentetba sülen anogo ishika lir minister Abdul Baqi Haqqani-i osangbenertem den sensaksemba mapang policy tasentem sangdonga liasü.

1990s tatemlen Taliban-i Afghanistan yimsü asüba aser tang koda temelenshi bener arua yimsüsüdir ta alimai

repranga atadar. Parnoki mezüng yimsü asüba mapang kaket shisatsü bushitsü atema tetsürtem nem temelaba magütsü aser parnok lokti nung kecha shilem magidaksü.

Tetsürtem dak sendakba nung parnok tebilemba densema Taliba-i parnok melenshiogo, ta shia arudar. Ajisüaka tawa teburtem den kasa temeden khanga longkak aiter tetsürtem dak parnok tashiyim amshiba nguogo.

Haqqani-i ashiba agi, Taliban-i taoba küm 20 dangi tanaben meyipa moner. "Tanü kechi jenjang nung linük lir iba dak ajemdaker renloka oner," ta pai ashi.

Ajisüaka Taliban yimsüsüba kübok tetsür university kaketshirtem nem tenokdangba balala agütsütsü, kong

sobosolemstü densema lir. Haqqani-isa, tetsürtem ajaki hijabs asemstüla ta ashi, ajisüaka pai tekolak jendangba sü kisüng asü tejak ajunga nembangstüla, iba indang osang tejangja magütsü.

Tetsür aser tebur bendangtsü, ta paisa ashi. "Onoki tetsür aser teburtem külemi kaketshisatsü angazüktettsü memelatsü. Onoki co-education atema temelaba magütsütsü," ta pai ashi.

Haqqani-i, university tem nung sayuba subject tema asdangshitsü ta ashi, ajisüaka iba dak sendakba nung ken o tatongi rasaa mashi. Taliban, shirnoki Islam tamangba yimsü dak ajemdaker yimsü asür, parnoki taoba mapang linük yimsü asüba mapang music aser art-a tenokdangba agütsür liasü.

## COVID-19 ya lab nungji adokba masü ta ashirtem China den sendaktepa lir

**Washington, Rongjui/Sept. 12 (Agencies):** China kübok Wuhan yimti nung COVID-19 tashidak ya mezüngbuba puteter küm ana tajunger, saka tang tashi iba virus poktetba mejangjateti lir. Saka virus ya China nungger laboratory ka nungi adokba südi ta temolung meleme jembia aruba nembang liasü, aser tang ano temai adokshir.

The Telegraph ajanga tawa bushisüngdangba nung, COVID-19 tashidak lab nungi adokba aija The Lancet medical journal dangi shidi zülur scientist 27 rongnung 26 bo China indang Wuhan Institute of Virology nung research agir den tesendaktep lir mesüra liasü, ta ngutet.

2020 küm February ita The Lancet ajanga adoktsüba shidi nung, COVID-19 ya pasasa adokba masü ta mangatetep theory tem ajanga ashiba aitsür aser coronavirus ya aremshiruru nungi adok ta lonük aika nungi scientist temi bushitet, ta shia liasü.

Iba shidi zülurtemi Wuhan lab

den tesendaktep kecha temai madoktsü, saka mapang talangka melie iba shidi ya British zoologist Peter Daszak-i shia züludaktsüba liasü, ta temai adok. Peter Daszak ya US nung amenoka aliba EcoHealth Alliance nung tir lir, koba ajanga Wuhan Institute of Virology nung research balala agitsü senotsü agüja liasü.

Taoba küm June ita iba jurnal ajanga Peter Daszak aser laboratory sendaktepa aliba indang jangjashitsü aser iba kaket nung shidi adoktsüba mapang tongtipang osangtem temai madoktsü liasü, ta nangzük.

Virus mezüng putetba yimti, Wuhan nung aliba laboratory ka nungi coronavirus ya mazüokteteti mesüra memeteti temai adok südi, ta temolung meleme jembir. Wuhan Institute of Virology (WIV) nungya küm ter dak tema lah dak aliba coronavirus asadanga arua liasü. Iba institute ya Huanan wet market nungi minute 40 shi pilar lir, kong Wuhan kübok tashidak menatetepa aoba mezüng puteta liasü.

Iba theory busemer temi virus ya WIV nungi memeteti temai adoka wet market nungya prokshi südi, ta ashir. Saka kari iba virus ya nisungi yangluba masü arem nungi adoka melenshiba virus ka, ta ashir.

Taoba US Tir Donald Trump-i iba virus ya nisungi yangluba lir ta sangdongba sülen US media nung iba mangatetep ka mesamai arur aser nisungi yangluba südi ta jembiba nung tebilemdangba tasen ka aiter. Wuhan laboratory nung research agir asem 2019 küm November ita mozü kidang temang anepalua liasü, ta US itdangiter osang ka ajanga ashi.

Tir Biden indang chief medical adviser Anthony Fauci-i May 11 nü US senate committee dang virus ya nisungi yangluba südi ta amanger aser ibai bushisüngdangtsüla, ta shia liasü.

Wuhan nung iba tashidak poktetba indang bushisüngdangtsü aortem den China-i temolung süa amalitep malir, aser iba yongji tanü tashi kuli tejangja ka monguteti arur.

## Pakistan anentsüh aser tzümetsüng lendong nung nisung 17 asü

**Peshawar, Rongjui/September 12 (Agencies):** Deobar anepdang northwestern Pakistan len tesem aika nung tzünglu kanga sangshia aruba den anentsüh aluba ajanga ki aika raksaogo aser nisunga 17 tashi süogo, ta police sangdong ka ajanga metetdaksü.

Ketdangsur Mohammad Nawaz-i ashiba agi, Tor Ghar district nung longru ki chireper aliba aser lishi nungi tasü mang terka agitetogo aser teküzmükba maparen balala inyakertemi tetsür aser tanur densema iba lendong nung samara alirtem bushidar, ta metetdaksü.

Nawaz-isa, iba district kübok kinük nung aliba yimtsüng ka nung ki asem aponger ao aser kasa mapang nung tanga kitema tzümetsüng agi kongshio, ta

Abbottabad nung amenoker aliba ketdangsurtemi ashiba agi, yimti tezülen anentsüh aluba lendong nung kibong ka nungi kinüngtsü aser kinungbo na den par tanur ka asü aser tanga asem tashi yirua liasü.

Pakistan disaster management authorities-i ashiba agi, parnoki anentsüh aser tzümetsüng lendong agi kongshir aliba tesemtemi teyari yokogo, ajisüaka tenem lima nung anentsüh ajanga lenmang nokdangter aliba ajanga teyari mapang shidak nung magütsüteti lir. Anentsüh agi nokdangter aliba lenmangtem merenketdar, ta parnokisa metetdaksü.

Pakistan nung tzünglurowa ya September tom tashi alir aser iba amala tatalokbatem ya kanga bulua ataloker.

## Süogo ta jembisang al-Qaeda lenir al-Zawahiri video nung adok



**Rongjui/September 12, 2021 (Agencies):** Al-Qaeda lenir Ayman al-Zawahiri, shiba süogo ta olulu prokshia liasü, pa ya United States nung 9/11 lendong ataloker küm 20 ajungba anogomung nung par telok indang official media arm ajanga sayaba video tasen ka nung adoka liasü.

US nung amenoka aliba SITE Intelligence Group, kobai jihadist teloktem online nung inyaksangshiba tsüngsü apur, parnoki ashiba agi, al-Qaeda ajanga sayaba ghonda ka talang video nung al-Zawahiri-i Russia military base ka amaktsü densema onük aika nung jembia liasü.

SITE indang director Rita Katz-i ashiba agi, al-Zawahiri-i jembiba mapang Taliban-i Afghanistan linük agiba indangbo mesüok.

Taoba küm November ita al-Zawahiri ya süogo ta sangdongaka video nung pa sayu, ta Katz-i ashi. 9/11 lendong ataloker küm 19 ajungba anogomung nung par teloki video message ka sayaba nung pa adoka liasü.

Al-Zawahiri densema kiralongraba telok, al-Qaeda lenirtem ya timba Afghanistan aser Pakistan arütsülen alir, ta

United Nations ajanga ashir. "Züngsem linük kati pa taküm alitsü ta ashi, saka olulu prokshiba nung adentsü tashi kanga mait," ta UN osang ajanga shia liasü.

Pa asüba olulu temai adokba sülen al-Qaeda lenir Ayman al-Zawahiri ya minute 60 video tasenba nung sayaba ajanga pa ya masü, ta kuli kar agütsür, ta Katz-i Twitter ajanga ashi.


Al-Zawahiri ya Egypt nungger lir aser iba telok nung tekolakba ama Osama Bin Laden melenzüka liasü. Iba video tasenba nung taoba ita Afghanistan nung US ainshiba indanga jembia liasü.

Ajisüaka Taliban-i Afghanistan nung takok anguba indangbo mejembi aser Afghanistan nungi US ainshiba indang jembiba ya Doha Agreement agiba sülen February 2020 tetenzüklen ashiba alitsü akok, ta ashir.

Anungji pa ya sür alitsü akok, aser yamaji asünunga pa ya January 2021 meta süa alitsü akok, ta Katz-i ashi.

"Ajisüaka itdangiter temi tang tashi Zawahiri asüba indang kuli tejangja magütsüteti lir, anungji pa takum ali asü mali ta tasüngdangba ka lir."

## Amazon Prime Video nung 'Bell Bottom' sayatsü



**Mumbai, Rongjui/September 12, 2021 (Agencies):** Deobarnü, Amazon Prime Video-i espionage thriller Bell Bottom sayatsü asoshi osang sangdongogo. India nung Amazon Prime member temi aser linük 240 den territory balalai September 16, 2021 nungi tenzüka Amazon Prime Video nung iba film stream asütsü akok.

Ranjit M Tewari-i direct asüba film nung, Akshay Kumar, Vaani Kapoor, Huma Qureshi Lara Dutta, Adil Hussain aser Aniruddh Dave densema Bollywood star balalai shilem agiba angutsü.

Vashu Bhagnani, Jacky Bhagnani, Deepshikha Deshmukh, Monisha Advani, Madhu Bhojwani & Nikkhil Advani nungeri parnok indang pei pei banner - Pooja Entertainment aser EMMY Entertainment kübok Bell Bottom film produce süogo.

Bell Bottom nung hijacker temi nisung 210 shi pur aoba kümzüktsü mechi Akshay

Kumar-i undercover agent ka ama inyakba angutsü.

"Audience temi action aser thriller otsütem sapuba onoki jangjaa lir aser tang parnok dang Bell Bottom ajanga otsü tasen ka sayatsü renema lir," ta Director & Head, Content, Amazon Prime Video, India Vijay Subramaniam-i ashi.

"Terepranger temi (theatre) iba film tzuratema agizükogo aser alima ajunga iba film sayatsü asoshi sentong lir. Film script tajung den shilem agirtem sempet ajanga iba film tepor jungdaksüogo. Onok maparen nung tongtibang shilem aka ama onoki iba film bendenloker," ta pai ashi.

"Amazon Prime Video ajanga iba film alima ajunga dang sayatsü maongka tajung anguba asoshi pelar," ta Director Ranjit M Tewari-i ashi.

"Iba film ajanga asenoki mejangjai/mangashidang aliba tongtibang nübu balala indang otsü angashitsü/angutsü aser iba amala otsü ya alima dang

metetdaksütsü nungdak ta ni bilemer. Tereprangertem atsüa arutsüsa film nung temeyoktep otsü balala angutsü aser actor temi otsüi aginüba ama tatem tashi junga inyakogo," ta Ranjit-i ashi.

"Theatre nung sayaba sülen, nübur timba dang iba otsü sayatsü asoshi mapang agi bener arutsüogo aser Amazon Prime Video ajanga India audience densema linük 240 dak tema aser territory balala nung Bell Bottom sayatsü renemdar. Iba film ajanga alima ajunga nung film sapurtem atsüa arutsü imlaa atar," ta film nung tongti shilem agisang Akshay Kumar-i ashi.

"Entertainment tsütsü ajungkettsütsü aser blockbuster tajung ka kümdaksütsü nükjidong yur Ranjit M Tewari den cast aser crew ajungai Bell Bottom atema inyakogo. Tawa, audience temi action movie tem reprangtsü tali jangraba ni nguogo. Iba film digital ajanga linük 240 dak tema aser territory balala nung sayatsü asoshi Amazon Prime Video den teka amteptsü maongka anguba atema pelar," ta Producer Jacky Bhagnani-i shisem.

Bell Bottom ya tatalokba otsü nung ajemdaker yangluba film ka asütsü. Iba espionage thriller film nung India indang mezüng 'covert operation' takok ngua achayangtsü asoshi Akshay Kumar-i undercover agent' ka asalentong balala yanglur. Iba film ya India nung nisung tamajungeri tai malirtem apuba otsü ka asütsü.

## 'The Expendables 4' nung Andy Garcia denogo



**New York, Rongjui/September 12, 2021 (Agencies):**

'The Expendables 4' indang cast rongnung Andy Garcia denogo.

Scott Waugh-i direct asütsü aliba project tasen nung arishi küm 65 tain actor Andy-i iba franchise indang taoba installment nung actor talisa Jason Statham, Dolph Lundgren, Randy Couture aser Sylvester Stallone nunger den külemi shilem agiba angutsü.

Andy, shibai 'The Godfather' franchise nung Vincent Corleone ama shilem agiogo, taruba project nung pai CIA agent ka ama shilem agiba angutsü, ta The Hollywood Reporter sangdong ajanga metetdaksü.

Instalment pezübuba atema Andy den tejak tasen temji Curtis '50 Cent' Jackson, Megan Fox aser Tony Jaa

nunger asütsü.

Taküm October ita iba project tangok tenzütsü aser iba movie ajanga tanaben mercenary tejentem longjemer inyakba otsü sayatsü.

Jason-i iba film nung shilem agiba den külemi pai iba project produce asütsü. Pa den Dolph, Randy aser Sylvester nungeri taoba installment asem ama pei tata shilem tanaben agitsü.

Spenser Cohen ajanga iba movie atema script zülutsüogo. Ajisüaka, iba project dak sendakba nung otsütem film yanglurtemi temai madokdaksü meimbanga lir.

'The Expendables 3' tangokba mapang. Jason tasü nungi jenbuba otsü lemsatapa liasü. Iba movie atema stunt ka renemba mapang, Hollywood star Jason Statham tzü nung tera agi dang marakset.

## Blackpink-i YouTube nung alizüng tasen ka tongtet



**New Delhi, Rongjui/September 12, 2021 (Agencies):** Video channel nung subscriber' timtiba artist' rongnung K-pop superstars Blackpink kümogo, ta YouTube sangdong ka ajanga metetdaksü.

Blackpink-i iba alizüng tongtettsü asoshi, YouTube sabang nung 'subscriber' tsütsü parnoki Justin Bieber ajangteta subscriber million 65.5 shi kümogo.

"Onoki iba alizüng tongtetba ya mamangteter. BLINKS (Blackpink fans) teyari ajanga onok nem iba maongka tulu sempettsüogo," ta telok nung kentener Jennie, Lisa, Jisoo aser Rose nungeri ashi.

"Alima ajunga nung fans dang onoki iba tetushi bendanga agütsüner, shirnoki onok wadang ajunga nung metetimi

nungita aruogo," ta Blackpink puri ashiba olen ka Billboard.com ajanga lemsatap.

"Onoki iba alizüng tongtettsü asoshi BLINKS ajanga kanga nungita yariogo. Anungji, parnoka iba tetushi nung pelateptsü onoki imlar. Onok indang music aser video ajanga fans tali atsüa arutsü aser tajung tsütsü temelenshi adokdaksütsü nükjidong yur maneni inyaktsü," ta Blackpink-i shisem.

Tesüiba ita ishika tejakdang, YouTube nung subscriber' timba artist rongnung Blackpink pur tanabuba liasü. April ita Justin Bieber, shiba tang subscriber' million 65.1 shi lir, pa sülenbo Blackpink pur tanabuba küma subscriber' million 60 dak tema tuadok.

Top 5 nung Artist ana sülen

YouTube nung BTS subscriber' million 57.7, Marshmello million 53.8 aser Ariana Grande million 49.6 subscriber kümogo.

YouTube sangdong ajanga angazükba agi, tesüiba küm alima tesem balala nungi Blackpink puri views' billion 9.7 dak tema aazüka liasü.

Alima ajungai jangjaa aliba superstar telok indang music video pezü - 'Ddu-Du Ddu-Du', 'Kill This Love', 'Boombayah' aser 'As If It's Your Last' shia nung views billion 1 tuogo.

Lisa-i la meyong aser mezüng nija project, 'Lalisa' sangdongba anogo, Blackpink puri iba record yanglua liasü. Iba quartet nung kijai sayaba project rongnung la züngsem tasembuba asütsü.

2018 küm November ita Jennie-i 'Solo' ta nungja agütsüba ken ka saya. Rose-i -R- saya, koba March nung 'On the Ground' aser 'Gone' kensep nung dena liasü. Parnok rongnung nija project yanglur tesübuba ji Jisoo asütsü, lai ano nija project ka danga yanglua mali.

Blackpink ya YG Entertainment ajanga tentetba South Korea tsür telok ka asütsü. 2016 küm August ita iba telok ajanga mezüng kensep - 'Square One' saya, kong 'Whistle' aser 'Boombayah' ken dena lir.

## 'Into The Wild With Bear Grylls' nung Ajay Devgn-i shilem agitsü



**New Delhi, Rongjui/September 12, 2021 (Agencies):**

Discovery' indang nungtugu adventure show "Into The Wild With Bear Grylls" indang episode ka nung Bollywood star Ajay Devgn-i shilem agitsü terenemba lir, ta Deobarnü iba show yanglurtemi osang sangoktsü.

Iba episode atema, arishi küm 52 tain Devgn-i host aser nungtugu adventurer, Bear Grylls den külemi Maldives nung tangoktsü. Iba episode yakta tangoktsü asalentong yangludat.

2019 küm, Ato Kilonser, Narendra Modi-i "Man vs Wild with Bear Grylls and PM Modi" indang episode ka nung shilem agiba alimai jangjaa lir.

Taoba nunga, Bollywood nungi superstar talisa Akshay

Kumar aser Rajinikanth nati Grylls den külemi iba adventure episode balala nung shilem agiba asenoki nguogo.

Ajay aser Bear Grylls indang 'Into The Wild With Bear Grylls' episode ya discovery+ app nung mezüng sayatsü.

Acting tsütsü, Ajay Devgn-i tawa sayaba "Bhuj: The Pride of India" nung tongti shilem agiba nguogo. Ajay-i ano film talisa "Gangubai Kathiawadi", SS Rajamouli indang "RRR", sports drama "Maidaan" aser pai direct asütsü renemba "Mayday" nung shilem agitsü sentong lir.

Item project dak alia, Ajay-i digital sabang nung ajemoka Disney+ Hotstar series "Rudra: The Edge of Darkness" nung shilem agitsü renemdar.

# Emma Raducanu-i US Open kokogo Sri Lanka teamnung Maheesh züngoksemogo



**New York, Rongjui/September 12 (Agencies):** British tsür Emma Raducanu-i Honibarnü US Open koka qualifier tem rongnung Grand Slam akokba mezüngbuba asayar kümogo. Lai US Open tetsür kija asaya final nung Canada tsür Leylah Fernandez koka liasü.

Arishi küm 18 tain Raducanu ya British tsürtem rongnung küm 44 sülen mezüngbuba Grand Slam akokba asayar kümogo. Lai 6-4, 6-3 agi arishi küm 19 tain Fernandez koka sempet USD 2.5 million agizükogo.

"Ni kanga junga asayatsüla ta meteta liasü. Asaya melara masü asü saka kanga junga asayar ama bilemer. Ni akokba

tashi tajungtiba asayatsü nüngdaka liasü," ta Raducanu-i ashi.

Raducanu-i asayamung tepeyong nung set ka danga tangar nem mekokdaksüi asaya. Lai qualifying asaya asem aser main draw asaya tenet nung set ka nung danga tamakok mangu.

Virginia Wade-i 1977 küm Wimbledon akokba sülen British tsürtem rongnungi asayar kati danga Grand Slam mekoki aliba tang Raducanu-i US Open kokogo.

Queen Elizabeth II aser British nunger nüngtugu tennis asaya Tim Henman nungeria Raducanu nem tenüngsang agütsüogo.

Kasa mapang nung

Fernandez, shiba Hombarnü arishi küm 19 junga liasü, lai defending champion Naomi Osaka, second-ranked Aryna Sabalenka, fifth seed Elina Svitolina aser Slam asembe tashi koker alila Angelique Kerber nunger koka final atong.

"Taoba hopta ana kanga junga asayatetba atema ni kanga pelar," ta Fernandez-i ashi. "Maneni final nung asaya-shidakba trophy koktetsü imlar," ta laisa ashi.

Williams-i 1999 küm iba asayamung akokba sülen Raducanu ya US Open akokertem rongnung tanutsütila aser 2014 küm Williams sülen tang lai set ka danga drop mesüi US Open tetsür kija asaya kokogo.

1999 US Open nung Serena Williams arishi küm 17 asüdang lai arishi küm 18 tain Martina Hingis akokba sülen tang mezüngbuba aiür chanu ana final asayaogo.

## T20 World Cup atema Bangladesh team sangdongogo

**Dhaka, Rongjui/September 12 (Agencies):** Aruya aliba Twenty20 World Cup, koba taruba ita (October) nungi asaya tenzüksü terenemba lir, iba asayamung atema, Brehostibarnü, asayar takotet Rubel Hossain mendeni Bangladesh team nung asayartem sangdongogo. Fast bowler Rubel ya 'reserve player' ka ama shima lir.

Iba asayamung ya United Arab Emirates aser Oman nung lemsar asayatsü aser all-rounder Mahmudullah-i anir Bangladesh team nung züngsem 15-i iba asayamung nung shilem agitsü.

Iba format nung, tajangshiba peria maliba ajanga, squad nung Tamim Iqbal maniok. Taoba ita Bangladesh nung ayongba series nung Australia madak 4-1 agi series akok aser opener Saumya Sarkar-i junga masaya yongjia, Bangladesh squad nung pa aniok.

Tawa, Mushfiqur Rahim-i wicket-keeper mapa toktsütsü aser batsman takotet ka ama team nung asayatsü lemtetba sülen, Nurul Hasan-i wicket keeper amentsü.

Twenty20 World Cup nung, Bangladesh atema Rubel

Hossain aser leg-spinner Aminul Islam naprongla reserve player' ama shilem agitsü. Asayar tejen aser all-rounder Shakib Al Hasan-i team atema ano maneni shilem tajung agitsü imlar. Tawa home series' (Bangladesh) nung, Bangladesh-i Australia aser New Zealand madak takok tulu anguba mapang, team atema Shakib-i alakteta shilem tajung agia liasü.

Iba asayamung nung October 17, 2021 nü Bangladesh team mezüng Scotland den asayatsü lemtükja lir aser Super 12 stage' tongtetsü atema iba telok nungi temaba team ana rongnung parnok densemte nüngdaker. Iba group nung, Bangladesh dak alaka Papua New Guinea aser asayamung tayonger Oman na dena lir.

T20 World Cup atema Bangladesh squad nung asayartemji Mahmudullah (captain), Mohammed Naim, Soumya Sarkar, Liton Das, Shakib Al Hasan, Mushfiqur Rahim, Afif Hossain, Nurul Hasan, Mahedi Hasan, Nasum Ahmed, Mustafizur Rahman, Shoriful Islam, Taskin Ahmed, Mohammad Saifuddin aser Shamim Hossain nunger asütsü.



**Rongjui/September 12, 2021 (Agencies):** Sri Lanka-i Deobarnü arishi küm 21 tain spinner Maheesh Theekshana Twenty20 World Cup team nung züngoksemogo. Twenty20 World Cup ya United Arab Emirates aser Oman na nung October aser November tsüngda asayatsü.

Theekshana-i taoba hopta international jenjang nung mezüngbuba South Africa den asayaba mapang wicket pezü agia liasü. Pa left-arm spinner Praveen Jayawickrama den külemi team nung züngoksemogo, shibai taküm küm tetenzüklen Test asaya nung mezüngbuba Bangladesh den asayaba mapang wicket 11 agia liasü.

Spinner tem rongnung ano Wanindu Hasaranga aser Dhananjaya de Silva na densema lir aser reserve nung Akila Dananjaya aser leg-spinner Pulina Tharanga na züngoksema lir.

Pace bowler tem rongnung asayar tejen Nuwan Pradeep zühoksemogo aser pa den Dushmantha Chameera aser all-rounders Chamika Karunaratne aser Lahiru Madushanka nunger densema lir.

Niroshan Dickwella, Kusal Mendis aser Danushka Gunathilaka nunger July England nung oa asayaba mapang COVID-19 inyakyim sülen manidakba ajanga asaya nungi küm ka nokdangba agi team nung mezüngokba dak alia asayartem temelenshi aikabo mali.

Kusal Perera yirur aliba meyipa aruogo aser pai Minod Bhanuka melenogo.

Dasun Shanaka-i anir Sri Lanka team Group A nung Namibia den October 18 nü Abu Dhabi nung asayaa tenzüksü. Gropu A nung Ireland aser Netherlands-a densema lir.

Twenty20 World Cup atema Sri Lanka squad:

Squad: Dasun Shanaka (captain), Dhananjaya de Silva, Kusal Perera, Dinesh Chandimal, Avishka Fernando, Bhanuka Rajapaksa, Charith Asalanka, Wanindu Hasaranga, Kamindu Mendis, Chamika Karunaratne, Nuwan Pradeep, Dushmantha Chameera, Praveen Jayawickrama, Lahiru Madushanka, Maheesh Theekshana

Reserves: Lahiru Kumara, Binura Fernando, Akila Dananjaya, Pulina Tharanga.

## IPL nung Bairstow aser Woakes masayatsü

**New Delhi, Rongjui/September 12 (Agencies):** Sunrisers Hyderabad opener Jonny Bairstow, Punjab Kings batsman Dawid Malan aser Delhi Capitals all-rounder Chris Woakes nunger timtem balala ajanga aruya aliba Indian Premier League (IPL) nungi masayatsü telemteba agiogo.

England aser India nunger asayartem külemi 'bubble to bubble transfer' inyakyim kübok tayimtsü ka nung Manchester nungi UAE-i aotsü renem, saka tesemdanger team (India) indang camp nung COVID-19 putetba ajanga IPL team temi asayartem anir aotsü asoshi pei pei sasa achaayangtsüsa aküm.

India aser England tsüngda Test pungobuba asayatsü lia, junior physio Yogesh Parmar dak Covid-19 putetba sülen, iba asaya thinena liasü. Oval nung, Test pezübuba tasayadak nung

head coach Ravi Shastri densema India team support staff kar dak Covid-19 putetba sülen parnok quarantine' süa aru.

Tang, Dubai tonga arur asayar ajak anogo trok tashi quarantine' asütsüla aser ibaji ajanga Bairstow o Malan na iba League nungi tukadoker asütsü akok.

BCCI ketdangsür kati ashiba agi, September 19, 2021 nungi tenzüksü aliba IPL nung Bairstow aser Malan na masayatsü.

"Tenaprongla UAE maotsü lemtet. Asayar ajak anogo trok quarantine' asütsü tuyuba ajanga, iba League nungi tena tukadoker asütsü, koba mezüngbo iba tetuyuba magitsü lemtet," ta ketdangsüri ashi.

Sunrisers nung Bairstow-i asaya aruogo aser taküm Kings tenung nungi world no. 1 T20 batsman Malan-i IPL nung mezüng asaya liasü. Malan melen Kings nung Aiden Markram aniokogo.

"#T20WorldCup aser Ashes matongdang, Malan-i par adianutem den külemi amungtsü tebilemba lir," ta Twitter ajanga Punjab Kings-i lemsatet.

Season tetenzüklen, asaya tenet nungi Bairstow-i run 248 yanglu aser pa indang strike rate 141 tema lir.

Manchester nung asayatsü aliba asaya atema Bairstow, Woakes and Malan nunger England Test squad nung dena liasü.

### BILEMDANGANG

"Alizüng tonga asemte merangertemi tesülen lepa merpranger."